

2 Korontiyaya

Nda'ya

¹ Kyagha deleewar dāba ya a har Mbulus, tæthlænda Yeeso Kæræsti wurna Faara, tæ wan manæm Timoti, a nafiya Faara na a Koronti, heu tæ nafiya Faara na chahal a Akaya.

² A tsauka nggayirha tæ dædemnggid Faara Chinæm tæ yi Chinæm Yeeso Kæræsti a nagma tæ kun.

Usa Mbulus Faara na a nggab fiya heu

³ Parka yi Faara ni, Chin Chinæm Yeeso Kæræsti, Chindī na fiya hadang fa, tæ nggab farha.

⁴ Nggab kæm hu sæsad næm heu, tæ næm mbang nggab fingingya ahu sæsaarha na nanda sæ, tæ tur nggabrha kæm wal næm a fad Faara.

⁵ Kæsær kæla mul na sæsad Kæræsti hai a kæm, næghæn kee kæm mul nggabræ næm hai ka Kæræsti.

⁶ A nadan a sæsaarha, nan a saghæn fa ka nggabræ nun, tæ hærækræ nun, a wal dæn nggabrha, wal nan ndæn ka nggabræ nun, na a færang kæræsta kun hu tur sæsaddī næm a saarha fa ya.

⁷ Na shiiten nan tæ kun kanglang, sændansæ kæla nanun a wum teena tæ kan hu sæsad nan, nuwun kee kæm a wum teena tæ kan hu nggabræ nan.

⁸ Shayina, mbæ minna sæ a tsawun tæ yamid sænda wa, aten sæsaarha saanan fa a Asiya. Sæsaadan kaan, kalgha kan mu, har takh dæn a mæra.

⁹ Kan ndaghan kee nan a mæra. Amma katæra næn hai kee kæsær a malanggan mbærsarha tæ alten nan mbærsan tæ Faara, na a thleng mærya sæ.

¹⁰ Ndæghæn hærghangga kan sæ hu tur sæsad mærræ diya, ndæghænni kæm na a nggær hærghang kan. Ndæghæn ndæn shang nan teena fa næn a nggær hærghang kan,

¹¹ a sayiddi nun a dang kansæ tæ hwan Faara aten nan. Nanæn kee, fiya hangga na nda a usa Faara a meyed nan, kæsær ka parkaddi ænang nanda kan, thlæna Faara hwanda fiya hangga æna nanda a tennan.

Kyakhrang Mbulus hutenggæn hai

¹² 'Ya ænagha ndæn nanan a taala, fær huden nan shedawa tæ ndaarha tsawud nan hu kæshiddiya næghæn chahal tæ hura tal mbæ kæla tsawud nan tæ kun mawa, ænaghan ndæn tæ mbærsarha tæ nggayid Faara, mbæ tæ thladwayid kæshiirha wa.

¹³ Chireethleng ngwan 'ya kun dæ mbuwa nun mbang karatang sænanggun hai wa. Niyi a shiteena tæ ndaarha, a fara sæmæn banun a sænang hai ngga,

¹⁴ kæla katærang nun sænang ænggina hai ya. A fara na Yeeso a wutta ba banun sænang ænggina hai ngga, non a taala tæ kan, kæla nanan kæm a taala tæ kun.

¹⁵ Kæsær nggæmfi fa kee, ndæghæn ni na katæra bæra thlæmad nun ba, na a wal parka nun katæra særi.

¹⁶ Na minnasæ a weng tala ni kun a nadi a dæra Makidoniya dæ, nggæryi kyarha tæ thlæmad nun a nadi a wutta ba a makidoniya, na minnasæ kæm a dæewun sæ a nadi a dæra Yahudiya dæ.

17 Nun a numad ndaarha hu ngwad di kyana ya sɛngwi 'ya niya ɛnaarha wa? Nduwa nuwun a naghɛn ngwa ni fa yi thlu farha, a ndee, "Yo" nggɛryi wutta ba ndee, "Awo" wa?

18 Kɛla nana Faara tɛ kɛkafek fa, 'ya nanan a thlɛghang nda kun mbɛ naarha a pathlang "Yo" tɛ "Awo" wa.

19 Kɛsɛr Wan Faara, Yeeso Kɛrɛsti, nggi, tɛ Sila tɛ Timoti pɛrang nan labarghɛn kun, mbɛ "Yo" sɛ tɛ "Awo" wa, 'ya tsauka yi Faara "Yo" ni kɛtsar.

20 Kɛsɛr dɛfmi Faara heu nɛghɛn lɛlɛgdɛ hu Kɛrɛsti, tɛ ndarha "Yo", tɛ kɛm hu Kɛrɛsti nɛm ndaarha, "Atsaukake", a mamnggit Faara.

21 Faara ndɛn wumangga kan tɛ kun ishim tɛ shembe hu Kɛrɛsti. Ndɛghɛnni wurgha kan,

22 ndɛghɛn dɛfangga njaara kɛm fa hu ndaarha kɛm yighɛn ni. Tɛ kɛm ndɛghɛn ni fɛrangga Sɛsɛnggɛn kɛm ahur nɛm hai hu ndaarha kala 'ya ndaanɛn ba nɛm walghɛn a mbee.

23 Faara ndɛna shedawanna ndani kɛsɛr a nggɛr di chighang sɛsaarha kun wa ndɛghɛn wudwa ni Korinti dɛ.

24 Mbɛ nanan a ngyabang kun hu 'ya hai nun a fɛrkɛkafek tɛghɛn wa, amma nanan a ɛna taara heu tɛ kun, kɛsɛr ka wutsɛfayid nun, aten kɛkafekkid nun ni kɛm, ish nun tɛ shembe.

2

1 Nanɛn kee, niyi a numad ndaarha mbi nggɛr weng tala kun na a dɛng sɛbgha hura ni kun dɛ wa.

2 Kɛsɛr a sɛbang di hur nun dɛ, wunni takhka na a fɛrɛ wutsɛfayirha nɛn, a mbɛ kun sɛbang ni hur nun dɛ wa?

³ Ndən ɗa Chireethleng ni kun ɗə kəla ni tə ənaarha, nən ɗə tsaurha a ba ɗi ba, a səb hurna ɗə tə fɪngyayini na fəree wutsəfayirha wa. Kəkafek səndun sə heu wutsəfayid na nən kyarha ba ahu wutsəfayid nun.

⁴ Kəsər chireethleng nggi kun ɗə nggi hu billarha har tə amyirha kaan, mbə ka a kyanggi kun hu səbrha hura hai wa, awo, kəsər ka a kyadang nggəmdəna ni kun.

Chakh ɗimiyirha a niifa

⁵ A ɓang niifa səbrha hura ba, mbə nggi katenna ɓang nən ndən ba wa, amma ɓang nən ndən kun ba.

⁶ Niifɗiya, tsətsəlla ənang na fiya hangga ahur nun tsək ɗə kee.

⁷ Nanənya, a nggushi chahang nun ndən ɗə, tə kəm nggab wunun, naɗə səbrha hura kaan kalghən mu.

⁸ Kəsər kakee, niya hwan kun, nggəra man kyadang nggəmdə nun.

⁹ Əndi ənagha ndən chireethleng ni kun ɗə tənɪ səndasə tənun mbang kərəsta tə kəkərrədi ya, non kəm a əna taara tə 'ya ndang ni kun.

¹⁰ A chahang ɗun ɗimiyirha kowunni ɗə, nggi kəm chahang ɗi ndən ɗə. Əndi chahang ni ndən ɗə kamanggən, ana 'yasə pak kamngga a changgənəm ɗə, kəsər ka kun ni chahang ni ndən ɗə a mbed Kərəsti.

¹¹ Ənani kee naɗə Sheetan ɗathlang kəm fa. Tsaunən səndəm thladwayidghən heu.

Fatarya weerənda ɗəfmee

¹² A sayidfi bani a Toruwas ba ka bi pər Labaara na Mbənggən yi Kərəsti, wal di ine Chinəm kwa-mana hai.

¹³ Amma hunawa hurna hai wa kəsər dəwi wal wanmana Titus a mbəfi wa. Nanən kee mal fīngya fatakkwaya ni di Makidoniya də.

¹⁴ Usaarha a Faara na dang kəmsə tə wal həbrha hu Kərəsti. Faara kəm a dang kəmsə hu pər sənda Kərəsti nəm ko a yanggini, səndəfiya kəm nəghən kəla səd urdi.

¹⁵ Kəsər a fad Faara kəm səd Kərəsti ni hu fīngya walgha həəkrha, tə fīngya sahadgha.

¹⁶ A wumten fīngya, səd mərri ni, a fīngya kəm, səd yibrha ni. Wunni tsəkka na a əna tur tarfa nən ya?

¹⁷ Mban a tsam Labar Faara ka a wal chikrha nan kəla na fīngya hangga ənaarha wa. A meyedghən, naghan a thlək Kərəsti a mbed Faara tə kəkafek, kəla nafini thlənna nda kanda ba a thləmad Faara.

3

¹ Nəm a nggər fal ten nəm fadən wa, nduwa na mid nan deleewar faala a kun, nduwa a haar nun wa?

² Kun tə altennun kunni deleewar nan, yandfi chirethleng nanda hai ahur nun, kəsər kowunni a sənggənən, təkəm karatanggən.

³ Kyad dun ndaarha kun deleewar ni bağha ba a kii Kərəsti, kəsər ka tar nan, mbə yandfi chirethleng nanda hai tə ashilee wa, kəl yandfi na tə Səsən Faara na tə yibrha. Mbə aten feera wa, kəl yandfi na ahur fiya.

⁴ Həhəsyid diya ndən nanəm təghən hu Kərəsti a mbed Faara.

⁵ Mbə 'yasə nəm mbang kyatta tə ndaarha tə mbang ndə nan ni nana əna tardı ya wa. Mbang ndə nan kyaghən ba a haar Faara.

⁶ Ndəghən ni fərangga mbang nda kan hu tsawud nan fa tarya weerənda dəfmee mbə tə yandı na chichireethlee hai wa, amma yi Səsəna, kəsər chireelth di, nən bəl farha, Səsəna kəm nən fər yibrha.

⁷ Ana tardı bang mərta ba chireethleng nanda hai aten feera, bəda ba tə mamnggirha kaan har mbangwa Isəreelaya kəlang yid Musa wa kəsər ka kukwaryidghən padıgha hai kaan, ko nanən mbərda də.

⁸ Mbə mamnggit tar Səsəna kal yandı mamnggirha ya wa?

⁹ Ana tardı na a bang ngwa kumarha fiya tə mamnggirha kaan kiya, taara na a bang nggayirha ba nən a naarha manggən kaan.

¹⁰ Kəsər 'ya kaar na tə mamnggirha fa kaan, mbə mamnggirha sə a fadghən nanənya wa, a kəkərang dəm tə mamnggirha nanəm təghən nanənya.

¹¹ Ana 'ya na mbərədə tə mamnggirha fa, yi pakwandə, kəkafek nən naarha tə mamnggirha fa kaan.

¹² Tsaunən nəghəm tə shiteena kiya, mbə tərəmnda sə a fad nan wa.

¹³ Mban kəla Musa wa, lələbanga yidghən amana Isəreelaya naa mamnggit djarra kukwaryiddi na a mbərədə.

¹⁴ Amma tsə hur ndan kakrak ta weeri dəba ya,

balgha lələbrha ten da sə a nanda karata deleewar ngyakhrha. Kəl hu Kərəsti ni kee katenggən ndəna lələbrha ten di haara də.

¹⁵ Ta weeri dāba ya, kala sayi a nanda a karata deleewar ngyakhrha Musa, lələbəddi ya nən nggəlang hur ndan.

¹⁶ Amma a sayiddi kyaharna niifa thləmad Chinəm ba, na lələbəddi a haara də.

¹⁷ Chinəm ndəna Səsəna, kala mbərha na Səsən Chinəm sə, a mbəda ni na wal alteena sə.

¹⁸ Kan heu harang nanda lələbəd da də a tennan naghan a kyad mamnggit Chinəm, na kyakhrang kan hai tsawan kəla ndəghən, hu mamnggirha yi chikrha, kəsər bəghən ba a fad Chinəm na Səsəna.

4

Kəna hu wuchiwilteya

¹ Nanən kee, ka hadang nəm Faara fa ndən na nəm tə tardī ya, mbə fad nəm a mərə hai wa.

² Kar dan tar ən shilee fa na bəbee, mban hukrha wa, nduwa nggabən hai tə labar Faara wa, a meyedghən naghan a pər kəkafekkirha a pəpal. Nan pər kəkafek a mbed Faara kowunni na tə kəkafek fa nən a sənggənən.

³ Ko nana labardi nan a pəra nəghən bəbee, nən naarha bəbee kee a fingya na a sahatta.

⁴ Sheetan faara yi kəshiddiya tsang də hur nafiya fərwa kəkafek kakrak, amawa nanda naa kukwaryid labara na Mbənggən na a kyad mamnggit Kərəsti, ndəghən na kəla Faara.

⁵ Kəsər labara na Mbənggən nan a pəra mbə yi alten nan ni wa, nan a pər ndaarha Yeeso Kərəsti

ndəna Chinəm, kan kəm mafayinun ni kəsər ka Yeeso.

⁶ Kəsər Faara ndən ndagha, “Ngwa yangga kukwaryirha hai hu wula,” ndəghən ni yangga hai ahur nəm, ka a fərang kukwaryid sənda nən kəm aten mamnggit Faara hu yid Kərəsti.

⁷ Amma nəghəm tə tur kənadi ‘yahu wuchi-hulteya, ka a kyad mamnggit ənwuliten səsəməndə də nən ya kyaghən ba a thləmad Faara mbə a fad nan wa.

⁸ Səsang nda kan ko tə manggi ni, amma kalwanda kan mu wa, ko səngwa nan ‘ya nan a ənaarha, malang ngwan shiiten nan wa.

⁹ Səsang nda kan, amma kar wa Faara kan wa, dəghang nda kan hweede hai, amma bəlang ngwanda kan wa.

¹⁰ Kətsar nəghəm a wiirha hai tə mərri Yeeso ahu farha, tənəm kyad tsawud Yeeso a fad nəm.

¹¹ Kəm balgha tə yibrha fa, kətsar tsawud mərri nanəm sə kəsər ka Yeeso, təna nda naa tsawud Yeeso hu faddi kyanəm ya yi mərri.

¹² Nanən kee, mərri nəghən a əna taara ahur nan, amma yibrha nəghən a əna taara ahur nun.

¹³ Nəghən chichireethlee hai tə ndaarha, “Fərđi kəkafek, ndən kal ni sə.” Tsaunən nəghəm heu tə səsən fərkəkafek, ndən fər nan kəkafek kəm kal nan sə.

¹⁴ Kəsər səndəm ndaarha ndəghən ni thlengga Chinəm Yeeso sə hu mərri, nən a thleng kəmsə heu tə Kərəsti, nən a bəng kəm a mbedghən ba heu tə kun.

¹⁵ Ənggini heu ya ka a dānggən kun sə ni, kəla na nggayid Faara a weela ten fiyadə hangga, na usaarha a naarha sə kaan yi manang nda Faara.

Tsaurha tã kãkafekkirha

¹⁶ Tsaunøn kee, mërwa fad nan hai wa. Ko nanøn fad nøm na yi mërã nøn sãbrha dë, amma a hura na fad nøm naarha nggëra hai kala parra fara.

¹⁷ Sæsaddi kyanøm ya nëghøn ngguchit mbë kwas mbëra dë wa. Ndëghøn ni na a walang mamnggirha këm së mbuwa ngwalarha mbuwa nøm mbang sakhkøn.

¹⁸ Kësër mbë ängya na yirha a naarha ndøn nøm a këlång wa, kël fingya mbuwa nøm naarha. Kësër ängya nøm a naarha mba nda kwas mbëradë wa, fingya mbuwa nøm naarha këm, nøn tsaurha pakwandë.

5*Mbäd tsawud nøm a talara*

¹ Kësër sëndëmsë a chang nda chamda hai kyanøm yi këshidfiya, na tøn ndønëm së a thlëmad Faara, kënna a talara mbuwa tam charha hai yi pakwandë, tøn ngwana niifa të haara.

² Kësër hu chamdi ya nøm chichimnda, nagha a kukwasang këm fa kyangganda këm hu wurida hai kyanøm na a talara këla kalla lukrha.

³ Kësër a ngwang nda këm fa tëghøn, mba nda ba wal këm tawalth wa.

⁴ A sayiddi bal nøm hu chamdi ya, nøm naarha chichimnda kësër ka billarha nanëm së, kësër mbë nana minnëm së a kalang ngganda luwudda hai a fad nøm ya wa, amma ka a ngwang ngganda këm fa të yi talara, kësër 'ya na mëmëra nøn wal yibrha.

⁵ Faara ndən ənagha kəm a tsawum kiya, ndəghən fərangga Səsəna kəm a meyed ən dərha də, kəsər ka 'ya na bayi a mbee.

⁶ Tsaunən kee, nəghəm tə həhasyirha fa kətsar. Səndəmsə tə ndaarha, tsawud nəm hu kəshiddi ya, nəghəm ndəndəgha hai tə Chinəm.

⁷ Kəsər tsawud fərkəkafekkirha nanəm sə, mbə yi naarha tə yirha wa.

⁸ Nəghəm tə həhasyirha fa tə kəm na mid nəm sə ndəkrha hai tə faddi ya, dəm tsaurha tə Chinəm a talara.

⁹ Nanən kee na mid nəm a əna 'ya nəm na a mbənanggən, ko nəghəm hu faddi ya, ko mbuwum sə wa.

¹⁰ Kəsər kəm heu tətə ni a wuməm hai a mbed tsənggam ngwa kumad Kərəsti, kəsər kowunni nən a wal kəna əndi əna nən hu faddi ya, ko nəghən ngga, ko mbə ngga wa.

Labar shaulirha

¹¹ Nanən kee, hərəm nəm sən tə mani tərəm Chinəm, nəghəm a djitiirha a ləm fiya nəm ba. Kəsər sən Faara kəm kwarkwar, niyi a shiiten ndaarha səndun kan ahur nun.

¹² Mbə nanan a nggər fal fad nan a kun wa, amma ka a fərang kwamana nan kun non a taala tə kan, tənun nggərang fingya yina sə na a taala tə 'ya nəm a naarha tə yirha kee, ma yi hura.

¹³ A tsaudə kəla sauta nəm ni, kəsər ka Faara ni, ana hutən nan məməl, kəsər ka kun ni.

¹⁴ Nggəmnda Kərəsti ndən kyadəngga kwamana kəm, kəsər səndəmsə, mər niifa ka fiya heu, tsaunən kee mər nda də heu.

¹⁵ Mər nən ka fiya heu, tsaunən kee fingya balgha hai mba nda tsaurha ka fad ndan bal wa,

amma a niifdi mærga ka kanda, nggær nanda thleng sə.

¹⁶ Nanən kee, nanənya ta mbeedə, mban nggær tær niifa yi kəshirha ni wa. Ko nanən kaar tærghan Kærəsti kee, amma nanənya mban nggær ənaarha kee wa.

¹⁷ Nanən kee, kala niifa na hu Kærəsti, tsaudə weerənda niifa, hurad əngya heu mbær dadə, kyad weerəndəghən ba.

¹⁸ Ənggini heu ya Faara ndən ənagha ndən, ndəghən ni ənangga shaulirha kəm təghən hu Kærəsti, fərang tar shaulirha nən kan a fiya,

¹⁹ Shauli Faara kəshirha ta fadghən hu Kærəsti, kirasang ngwa dimiyid fiya aten ndan wa, ndəghən fərangga labar shaulirha kəm.

²⁰ Nanən kee, fathləngya ni kəm yi Kærəsti, kəla na Faara a ndikrha tə kəm. Nan a hwan kun a meyd Kærəsti, shaulima tə Faara.

²¹ Səngwa Kærəsti dimiyirha wa, kyang Faara hu dimiyirha hai kəsər ka kəm, tənəm wal nggayid Faara.

6

¹ Nanan a əna taara tə Faara naghan a hwan kun a thlədun nggayid Faara mere wa.

² Kəsər ndəghən, “Səkdī fadwa a sayid nggayirha, thlardī sa a far wal hərəkrha.” Niya ndang nda kun, nanənya nun a wal nggayid Faara, nanənya kəm far wal hərəkrha.

Səsad Mbulus

³ Mbə mid nan sə a tsawang nggan kowunni ən kii saara wa, ka amawa nanda 'yar tar nan.

⁴ Amma a meyedghən, ahu 'ya nan a ənaarha heu nan kyad fad nan fa tarya Faara. Kan a kərəsta tə səsaarha, tə kətəlla, tə billarha,

⁵ tə sa dəkrha fa, tə kənda hu porsəna, tə wal wundərha fa, tə kətəlla tə taara, tə yamid beena, tə miirha,

⁶ tə naarha chahal, tə sənda, tə kərəssa tə nggayirha, hu Səsəna tə Pədənda na tə kan ha, tə nggəmənda,

⁷ tə pər kəkafekkirha, tə səsəmənda Faara. Kəs dan karid nggayirha ha a har yisəma tə yikawa.

⁸ Kanda a manang nda kan, kanda kəm a kyala tə kan, tə səbang thləm nan də, tə fal kan. Tərgha nda kan fa nggabaya ni, amma nan thlək kəkafek.

⁹ Sən fiya kan, tər kan nda kəla səngwanda kan wa, kəla naghan a mii mərə, ko nanən kee naghan tə yibrha fa, tsətsəl nda kan, ko nanən kee bəlang ngwanda kan wa,

¹⁰ hu səbrha hura, parang kan tə wutsəfayirha fa. Hu yamiya, kan kəm a ənang kəna fiya hangga. Mbə 'yasə a har nan wa, kan ni kəm na tə əngya ha heu.

¹¹ Kun Korontiyaya, pərang dan kəkafek kun a pəpal, tə kəm na hur nan tsahai a kun.

¹² Bəbəngwan hura kun wa, kun ndən bəbəngga hura kan.

¹³ Niyi a ndikrha tə kun nanənya kəla wanggina, kun kəm inaman hur nun də a kan.

Kəs thləmaarha aten daharha

¹⁴ Ma wum dən teena tə nafiya fərwa kəkafek wa. Kəkən na tar nggayirha wumnda hai tə yi mbəlfəerha? Nduwa, na kukwaryirha tsaurha tə wula?

15 Pashid Kərəsti ni Sheetan wa? Na 'yasə wumangga nafiya na a takkwa Chinəm tə fingya fərwa kəkafek wa?

16 Yanggi dəfmee ni a pathlang nda kən Faara tə dāharha? Kəsər kəm wuri Faara ni na tə yibrha fa. Kəla ndana Faara, “Niya tsaurha tə kanda ha, wii hai kəm ahur ndan, niya tsaurha Faara a kanda, kanda kəm tsawa nda nafina.”*

17 Tsaunən kee, “Kyama sə ahur ndan, wura man fad nun də ma kanda, Chinəm ndən ndagha kee, A tsuwar dūn 'ya fa na tə paarha fa wa, nggi kəm niya thlə kun fa,†

18 tsawi china a kun, kun kəm tsawun wanggina nda həshya tə nishya, Chinəm na tə səsəmnda ha heu ndən ndagha kee.”‡

7

1 Tsaunən kee Shayina, nanən nəghəm tə dəfmi yini ya, kəl a tsawum chahal ma əngya mbuwa chahal na səbang fad nəm də, tə səsəna kəm. Taama tsawum lələgdā chahal na a fərang mamnggirha Faara.

Wutsəfayid Mbulus

2 Niya ndang nda kun inaman hur nun kandə. Mbə niifa sə ənang nan aibe fa wa, mbə niifa sə səbang nan 'ya fa wa, mbə niifa sə huk nan wa.

3 Ndawi kee ka a fərang aibe ni kun wa. Kəsər 'wadī teena pərang dī ndən kun nggəm dan kun kaan, mbə 'yasə na ndəghang kəm hai wa, ko hu mərə ni, mərəm kyab nduwa wal yibrha kyab.

* **6:16 6:16** Edzekiyel 37.27; 1 Kor 3.16; 6.19 † **6:17 6:17** Ish 52:11 ‡ **6:18 6:18** Sam 7.14; 1 Tar 17.13; Ish 43.6; Irm 31.9

⁴ Nggəmdī fa tē kun kaan, niyi a taala tē kun kaan. Waldi kaali kaan. Hu səsad nan heu niyi lələgdā tē wutsəfayirha.

⁵ Kəsər ko a sayiddi banan chehweed maki-doniya ba, yib wan wa, amma wal billarha kan kaan, a kəshi kakyathlanga, ahur yi nan hərəenga.

⁶ Amma Faara, ndəghən na fərang kaali fiya na tē səbrha hura, wal dān kaali tē bəd Titus ba.

⁷ Mbə ka bəd Titus ba kee ndən nan a əna wutsəfayirha wa, amma waldə kaali a fad nun. Pərang dā ndən kan tē ndaarha na mid nun sə na nggi, tē səbrha hura ənənun aten ənggini katəragha hai, tē fər ten nun na a deewun sə. Ən dani ya nggərgħa fəree wutsəfayirha kaan.

⁸ Kəsər ko səbang ni hur nun də hu deleewar dī chireethleng ni kun də, ənawi masəndi kee təghən wa, ko nanən kaar ənadi masəndi kee, kəla ni hai deleewar dī səbang də hur nun də, amma yi beena ni ngguchit kee.

⁹ Nanənya niyi tē wutsəfayirha fa, mbə ka səbang ni hur nun də wa, kəl səbrha hur nun kyang də kun hu kwamana hai. Amma səbrha hura ənənun ndən malang nun dīmiyid nun, kəsər tur yandā ni na mid Faara a naghā nafiighən təghən fa, nanən kee ənang ngwa 'ya kun fa mbuwa ngga wa.

¹⁰ Kəsər səbrha hura yi tərəm Faara ndəna kyang niifa hu mal dīmiyirha hai wal hərəkrha nən, mbə masəndi kee sə wa, amma səbrha hura yi kəshirha nən bang mərā ba.

¹¹ Tur yandi səbrha hura ya nəghən hu kwamana na mid Faara. Bangga 'ya kun ba na ngga, kyang də kun hu əna əngya hai na ngga, na mid

nun sə kyad̄ang nda fiya ənad̄un 'ya məməl. Səb hur nun də aten dimiyirha. Na mid nun sə a əna 'ya nun ndaana Faara. Na mid nun sə nggər əna 'ya na ngga. Na mid nun sə a əna 'ya nun mbənan̄gga Faara. Na mid nun sə a tsətsəl kowunni nun ənagha aibe. A hu ənggini heu ya kyad̄ d̄un ndaarha nuwun tə kəkafek fa. Ənad̄un əngya heu kamngga hu pal̄thdiya.

¹² 'Ya ənagha ndən chireethleng ni kun də, mbə a ten niifdi ənagha aibe wa nduwa kəm aten niifdi ənang nanda aibe fa wa, amma a kyad̄ang nggənda kun a mbed Faara hu fər alten nun a kan ənanun.

¹³ Hu ənggini heu ya wal d̄an kaali. Hu chighəd̄ kaali di wal nan, tək d̄an mbənda fa nanan Titus a əna wutsəfayirha, kəsər ka kun heu fərangga kaali, huna hurghən hai.

¹⁴ Kəsər ko ndang ni, niyi a taala tə kun, fəree wun shilee wa. Kəla ni naarha pərang kəkafek kun, kyaddə ndaarha taala niya ənani a tennun a Titus kəkafek ni.

¹⁵ Nanən kee nggəmnda Titus aten nun nəghən aten chikrha, kala sayiddi nən d̄al teena hai tə kun hu mamnggirha nun fərang nda, təkəm thlənun ndən fa tə d̄a shilee hai tə fər mamnggirha kaan.

¹⁶ Niyi tə wutsəfayirha, kəsər mbərsadi tə kun kaan.

8

Fəra tə hura tsahai

¹ Nanənya shayina, na minnan sə a sən ən d̄anun b̄ang na nggayid Faara hu kən hwan Faara nafiya Makidoniya b̄a.

² Kəsər kətəl nda fa kaan hu səsaarha kya nanda sahai, amma ka nana nda tē wutsəfayirha fa kaan ndən ənagha ndən fər nanda tē hura tsahai, ko nanən fa yamiya ni kanda kaan.

³ Kəsər səndisə fərgha nda hu 'ya na nanda təghən ha, har kalgha kanda mu. Kanda tē fad ndan,

⁴ hwanda kan kaan ka a wal kwaman fəra nda ka dāng ngganda nafiya Faara sə. Təna nda wal kwaman kyarha hur nafiya hai na a thlar nafiya na chahal na hu chehweed Yahudaya.

⁵ Kaldə 'ya kya nəm shiteena atenggən, katərang ngganda 'wa fər alten ndan a Chinəm, tərgha a fər alten ndanda a kan kəla na mid Faara a əna nda.

⁶ Kəla nan hai kee hwan dān Titus kəla 'wanən katərang hai, a dəgha mbeedə ngwalanggən əna tar nggayiddi ahur nun.

⁷ Tsaunən nuwun a əna 'ya ngga kiya hu fərkəkafek, hu labaara, hu sənda, tē njiteena, tē nggəməndə nun a kan, kəl a dūn mbeedə tē əna tar nggayiddi ya kəm.

⁸ Mbiyi a ndaarha tsaudə tətə a ənaghənun wa, amma nana minna sə a kəkərang nggi kəkəfekkid nggəməndə nun ni, tē kəkərang nda djiten fingya.

⁹ Kəsər səndun nggayid Chinəm Yeeso Kərəsti, ko nanən tē kənani, tsaudə tē yamirha kəsər ka kun, kəsər hu yamidghən, ndənun a tsaurha tē kəna ha.

¹⁰ Kulo 'ya niya ndang nda kun ya. A kwasarha, kun 'wagha fəra, nggər wun tsaurha nafiya 'wagha djiteena tē ənaghən.

¹¹ Nanənya ngwalaman tardi katərang nun hai. Djiteena kyad nun a katəradghən a məməlgħa tē fərrənun. Fərama 'ya kamngga tē wallə nun ha.

¹² Kəsər anadə tə nggəmnda hur nun, na nda a thlə fərrədi, hu 'ya nana niifa təghən ha, mbə hu 'ya kəm mbuwa na niifa təghən ha wa.

¹³ Mbə niyi a ndaarha a dang ngganda fingya sə kun a kətəlla fa wa, amma ka a nagma 'ya məməl,

¹⁴ nanənya ana 'yasə a harnun kəl thlar fingya yina nun tə 'ya na mid ndan. Təna nda thlar kun hu wallə ndan ha tə 'ya na mid nun a fara səmən kəm, a mbədiya komani məməldə,

¹⁵ kəla nanən chichireethlee hai tə ndaarha, “Yandı wumangga hai hangga, wumang ngwa hai kalgha 'ya na midghən wa, yandı wumangga hai ngguchit kəm, kədeng ngwa 'ya na midghən wa.”

Thlənda Titus a Koronti də dəgha thlə ənda ba fər nanda.

¹⁶ Usadı Faara, kəsər ka nggayidghən tsawang nən hur Titus məməl kəla na mid na ənaarha a kun.

¹⁷ Mbə nggəm nən fa tə hwandə nan kee wa, amma tərna midghən dərha thləmad nun də tafadghən.

¹⁸ Kəlama hai ya thlənang dan shad nan də a samadghən, falna nafiya kən hwan Faara heu ka targhən yi pər Labar Faara nən a ənaarha.

¹⁹ Wurna fiya ndən na ahu kən hwan Faara nagma a takkwa kan ahu əna tar nggayiddi nanan a ənaarha kəsər ka manang nda thləm Chinəm, tə kyad djiten nan yi thlaara.

²⁰ Naghan a da 'yaara hai, tə kwamandı nan a ənaarha tə fərrədi.

²¹ Kəsər na minnan sə a əna 'ya nan məməl mbə a mbed Chinəm kee wa amma a mbed fiya kəm.

²² Naghan kəm a thlənang tahad shad nan də a samad nafini səri ya. Saara hangga kan a kəkərang targhən, na taara a kukwasang fa tə kəm na kəkafek sə a fadghən. Nəghən a kukwasang fa kaan a dəgha thləmad nun də ka a thlar kun nən, kəsər ka nən fa mbərsa nən tə kun.

²³ Titus kəm, pashid tarna ni ahur nun, kəla fingya shayi nan, thlən nanda kanda hu kəngya hwan Faara də, yi manang nda Kərəsti.

²⁴ Tsaunən kee, kyadaama tur nggəməndə dī nanun təghən ha a nafini ya a kəngya hwan Faara heu, tə ndaarha kəm taala nan a ənaarha a tennun kəkafek ni.

9

Thlaara a nafiya Faara

¹ Mbə kəl chirethleng ni kun də aten thlaara a nafiya Faara na chahal a Urshalima wa,

² səndisə nəghən a kukwasang kun fa a furun. Niyi a taala atənggən a nafiya na a chehweed Makidoniya. Niyi a ndaarha, “Nafiya Faara na a chehweed Akaya ngwanda fa ka a kwasarha a fər yi ndan thlaara nda.” Tur djiten dī nanun təghən ya thleng də fingya sə hangga.

³ Amma niya thlənang shayina də ya, kəsər nadə tallə nan aten nun tsaurha mere, tənun tsaurha nggungwa fa, kəla ndani aten nun.

⁴ Kəsər a bad nafiya Makidoniya ba a samadna, bagha wal kun ngwa wun fa wa, na shilee a kəsang kan, sakwata kun, kəsər ka nggəm nan fa tə kun.

⁵ Tsaunən kee, niyi a numarha kamdə a hwan shayina nan ya a weng tala nda kun kapa na

sayiddi barhaba, ka a ngwalang ngganda ngwarha fa aten fëra tē hura tsahai dëf nun mee kaman nggën. A tsauka fërrëdï tē hura tsahai mbē tē ngyabrha wa.

Faara na midghän tē fëra tē wutsëfayirha

⁶ Dalama teena hai tē labardiya, “Amma kala niifa hëfgha ngguchit nën hathla ngguchit, amma kala niifa hëfgha hangga, nën hathlang hai hangga.”

⁷ Kowunni ahur nun fërgaha këla terna hurghën, mbē tē ndaarha a sëndï kee wa nduwa tē ngyabrha wa, kësër Faara na midghän tē fëra tē wutsëfayirha.

⁸ Na Faara a fërang parka kun hangga kalgha 'ya na mid nun, kësër këtsar a wal kala ängya nun hangga na mid nun änaarha hu äna taara na ngga.

⁹ Këla nanën chichirethlee hai hu Deleewar Faara, “Hu fëra na harghën tsahai, fërang dë fa yamiya tē haara tsahai, nggayidghën mbē tam ngwalarha wa.”

¹⁰ Faara ndëna a fër wiirha a tē hëfrha, ndëghën ni na a fër ännarhami ka a hëbëm, nëghën kee këm nën a fërang kun nggërghën chik wallu nun ha, halth nggayirha nun hangga.

¹¹ Këtsar na Faara fërang këna kun hu kwamangya hangga, tönun fëra tē haara tsahai kala sayi. Nanën kee fiya hangga na nda a usa Faara hu fëra nun a thlëng kanda dë a harnan.

¹² Tardï nun a änaarha ya, mbē ka a dänggën nafiya Faara së na chahal katen ndan wa, amma na fiya hangga a chik usarha a Faara.

¹³ Tar nggayiddï kyanun ya, kyad nën fërkëkafekkid nun ni, na fingya a manang thlëm

Faara kəsər nggəm dūn fa tə labar Kərəsti, kəmɗa kəsər ka fərrənun haara tsahai ənang nun kanda tə fɪngya.

¹⁴ Kanda kəm nanda a hwanang Faara kun sə, na nda naarha ɗal kun teena kəsər ka nggayid Faara kalgha mbərha mu kyadang nən kun.

¹⁵ Taama usa Faara nəm kəsər ka nggayid fərrəghən kalgha mbərha mu!

10

Kal Mbulus sə aten targhən hu kən hwan Faara

¹ Nggi Mbulus tafadna niya hwan kun tə sam-mayirha tə hakkilo tur yi Kərəsti, nggi na nda aarha, “Bayirha” a nadi a thləmad nun, amma, “tə ndeethla” a mbi a thləmad nun wa.

² Niya hwan kun a nggehe ɗun hu ngyangthlanggirha hai a ba ɗi ba wa, kəsər səndisə niya naarha ngyangthlang aten nafini na a numarha tə ndaarha əndi nan a ənaarha ya yi kəshiiirha ni.

³ Ko nanən nəghəm hu kəshiiirha, mban a yanda kəla na kəshiiirha ənaarha wa.

⁴ Kəsər karid yanda nanan təghən ha, mbə karid yanda kəshiiirha ni wa, yi səsəmnda Faara ni, na changgəlang mbəya hai na kəkanglang tə ngaala yi nggabarha.

⁵ Kan nan changgəlang kala 'ya hai na 'yada sənda Faara, nan wudang kala tur yanggi huteena ba naghā a əna taara tə 'ya ndaana Kərəsti.

⁶ Naghan nggungwa fa kəm a tsətsəl kowunni nan kargha əna taara fa tə 'ya ndaana Kərəsti, a hərəm dūn ləɗang 'ya ndaana Kərəsti.

⁷ Nuwun a kəlang əndi na yid nun a naarha kee. A nggəm niifa fa tə ndaarha ndəghən nggi

yi Kərəsti ni, ngwa ngərgha numarha ngga, kəla nanən yi Kərəsti ni, kan kəm nan kee.

⁸ Nanən kee, ko ənani taala aten səsəmnggid di fərang na Chinəm kan ka a dang nggan kun sə, mbə waleng nggan kun də wa, mbə shilee a kəseerha wa.

⁹ Mbə minnasə a nzəmnggənun tə ndaarha nana minna sə a tərmang nggi kun tə deleewar yina wa.

¹⁰ Kəsər ndagha fingya, “Deleewar yighən na nda haaghən tə shembe kaan, amma a kəma dūn hai yirha tə yirha mbə həhasasə sə a fadghən wa, tə kəm mbə ‘ya sə hu labarghən wa.”

¹¹ Tur nafiniya kamdə a səna nda sə tə ndaarha ‘ya nanan a thləkrha hu deleewar nan a sayiddi mbuwa nan a thləmad ndan, ndəghən dani nan a thləkrha a sayiddi nanan a thləmad ndan.

¹² Kəsər kan billa wan na a məməlang nggan fad nan tə fingya na mindan puwang fad ndan mbeedə wa. Amma tur fingya na kəkərang fad ndan tə ndan, tə kəm məməlang ngganda fad ndan tə ndan, mba nda ndəndəl wa.

¹³ Amma kan mban taala kal mbəra nən mu wa, kəl nan taala tə taara kyadang na Faara kan a pəpal, wumngga heu tə kun kəm

¹⁴ Mban dərha də inggun hu taala wa, kəla ‘wa wan weng tala kun wa, kəsər kan ‘wagha dərha thləmad nun də tə Labaara na Mbənggən yi Kərəsti.

¹⁵ Mban taala kalgha mbərha mu ahu taara ənana fingya wa. Amma nan a shiteena nana fərkəkafekkid nun aten chikrha, na tar nan a chik dərha mbeedə a pathlang nun kəm,

¹⁶ tənən mbang pər labar Faara hu chehweeya

na inggun ma kun. Kəsər mban taala aten taara 'wana nda ənaarha a mbəd tar niifa wa.

¹⁷ Amma, “Kala niifa na a taala, tətə ni a talgha tə Chinəm.”

¹⁸ Kəsər mbə niifa na a fal fadghən ndən na nda nggəm fa təghən wa, kəl yandı fal na Chinəm.

11

Mbulus tə fa thləngya Yeeso fa nggabaya

¹ Niyi a shiteena tə ndaarha kərsaama tə nuryid na. Kərsaama tə nggi!

² Niya sərəkraha aten nun kəla na Faara sərəkraha. Nuwun kəla wuronga dəf ni miina nun a kakh chimarha tal, ndəna Kərəsti.

³ Amma niyi a tərəmnda, nən də naarha kəla kyadang na huthne ndəndəlyid nggabaarha Hauwawu, nadə numad nun sakhdang kun malanggun kəkafekkid 'ya na chahal ndaana a Kərəsti.

⁴ Kəsər nun yakh thlə nafiya fa pəpa na bang labar Yeeso kun ba pak ma yandı Yeeso pərang nan kun, nduwa thlə səsəna nun pak ma səsən di thlənun, nduwa Labaara na Mbənggən ma yandı 'wa nun thləraha a har nan.

⁵ Mbiyi a numad ndaarha nafini nun aarha “Mamngya fathləngya Yeeso” kal nda nggi wa.

⁶ Ko nanən tsahe wanda kwaman ndikraha ha wa, niyi tə sənda. Kyadang dan əndi kun 'yahu kwamangya hangga.

⁷ Pərang di Labar Faara kun na Mbənggən təka. Manang ngwi tenna wa, kəsər ka a manang ngganda kun. Ənadi dimi wa?

⁸ Nani a əna taara tə kun, na fingya kən hwan Faara deesə, nən naarha kəla niya fasa kanda ka a ənang taara ni kun təka.

⁹ A sayiddi nani a thləmad nun billayi kun a deewun sə ana minna wudəbəla wa. Fa takkwaya bağha ba a Makidoniya fəreenda 'ya na minna. Tsauki billarha a kun kaar wa, təkəm mbi tam tsaurha billarha a kun wa.

¹⁰ Kəla nana kəkafekkid Kərəsti ahur na, mbə ni-fasə hu chehweed Akaya heu na mbang ndeerha a malang nggi taala wa.

¹¹ Kama nda niya ndaarha kee? Nggəmngwa ni kun wa? Sən Faara sə nggəmdi kun.

¹² Niya dərha mbeedə tə əna 'ya ni yakh ənaarha. Təni 'yadəng kwamana nafina fa na a ndaarha na nda məməl tə kan hu ənggini na nda a taala atənggən.

¹³ Nafiniya fa nggabaya fathləngya Yeeso ni, na nda a nggaba fiya hai hu tar ndan, tərgha nda fad ndan kəla fathləngya Kərəsti.

¹⁴ Ma wulang teena kun wa, kəsər ko sheetan ni tə altənggən tərdə fadghən kəla təthlənda kuk-waryirha ni.

¹⁵ Kəsər kakee, mbə ənwulteena ni wa, a tər mafayighən fad ndan hai kəla mafaya nggayirha. A mii ngwaladghən na nda a wal kənaghən məməl tə 'ya ənana nda.

Səsad Mbulus ka Kərəsti

¹⁶ Niya nggər thləkkən, a tər niifa nggi nura ni wa. Amma a tərđun nggi kee, kəl thlə nggi nun fa kəla nun thlə nura fa, kəsər təni taala ngguchit.

17 Ahu taala niya ɛnaarha, mbiyi a kaala sɛ kɛla na Chinɛm ɛnaarha wa, a meyedghɛn niyi a ndikrha fa kɛla yi nuryirha.

18 Tsaunɛn fiya hangga a taala tur yi thlu farha, nggi kɛm niya ɛnaarha kee.

19 Kɛsɛr kun nuwun ndɛndɛl kaan, amma kun a tsaurhahu wutsɛfayirha tɛ nurya.

20 Kɛkafek, kun a mbang tsaurha tɛ niifa kyangga kun hu tar mafayirha hai, nduwa huk kun nɛn, nduwa tsɛgha hasɛ tɛ kun, nduwa tɛranggɛn tenggɛn sɛ, nduwa mbi kun nɛn hu kɛmeegha.

21 Na shilee kɛseerha a ndadi kɛdi dan ma ɛna ɛnggina nan ya, ana niifasɛ na a taala aten 'ya nggi kɛm ni ɛnaarha kee, niyi a ndikrha fa kɛla nura.

22 Nafiya Ibraniyaya ni kanda wa? Nggi kɛm niyi kee. Nafiya Isɛreelaya ni kanda wa? Nggi kɛm niyi kee. Turya Ibrahim ni kanda wa? Nggi kɛm niyi kee.

23 Mafaya Kɛrɛsti ni kanda wa? Niyi a ndikrha fa kɛla tɛpabirha, amma kaldi kanda tsaurha ka mafarha. Kaldi kanda ɛna taara kaan, kɛnenda hu pɛrsɛna saara hangga, saadi dɛkrha fa tɛ wutɛterha, tɛ kɛm kɛtsar takhdi a mɛra saara hangga.

24 Sara tuf tsada na Yahudaya nggi tɛ wutɛterha kumnggit mahan kap wutarihe.

25 Sara mahan kanda a dɛk nggi tɛ sɛsaala, sara tal kanda a mbamba nggi tɛ ferya. Sara mahan nggirggi aama timda hai, nggi ahurghɛn. 'Wadi mɛnda pari hu wuri aama.

26 Kɛtsar nggi hu wiirha, sɛsaadi tɛ aam afa afa

tə kəm a haar fa fasa faaya, səsaadi a har nafina Yahudaya tə nafiya mbuwa Yahudaya, səsaadi hu wupəriya, səsaadi a kaheerha, səsaadi hu wuri aama, səsaadi a har nafiya ndagha fər nda kəkafek ashe fa fərəkəkafekkyā fa nggabaya ni.

²⁷ Kətəl di fa kaan, kulo yamid shibeena saara hangga. Saadi miirha fa tə hushimnda, saara hangga ni naarha kula ənnarhami. Kəse mbiirha saara hangga tə yamid ən kaala fa.

²⁸ Ma fingya yini ya, kala parra fara ni billarha tə laf fa takkwaya hu kən hwan Faara heu.

²⁹ Wunni mbuwa tə shembe, təkka ni yamid shembedghən fa? Wunni kyagha hu dimiyirha hai billawa nggi fa?

³⁰ A əna di taala, niyi a taala aten fingya əngya kyadgha yamid shembed na.

³¹ Faara chin Chinəm Yeeso Kərəsti, tsauna faala ka manggən pakwandə, səndasə mbə nggabarha niya thləkrha wa.

³² A Ndimaska ngwamna di na a kamu kutəra Aretis, dəf də nafiya a kwakirəm wupəri Ndimaska kəsər a kəseegha nda,

³³ amma dəfeegha nda hu kutasa hai fər nggi nda hai tə kwad halth maana yi Ndimaska həryi ma ndəghən.

12

Əngya kyadang na Chinəm Yeeso Mbulus

¹ Tsawee dəfa tətə a di mbeedə tə əna taala. Ko nanən mbə a deesə wa, niya ndikrha aten əngya kedee na Chinəm kəla səsəniirha tə əngya na bəbee.

² Səndi niifa hu Kərəsti huraya kumkap fada mbərgha də tərang nanda talara də yi mahan. Ko hu farha ko mbə hu farha wa, mbi sənda wa, kəl Faara ndən səngga ndən.

³ Kəla ndaani, səndi niifdiya, ko hu farha ni, ko mbə hu farha wa, mbi sənda wa, amma Faara ndən səngga ndən,

⁴ kula səndəghənsə tərangga Faara a mbərha də na ngga a talara. Səkdə əngya mbuwa nən mbang thləkrha, tur ənggini mbuwa na niifa mbang kalasə atənggən.

⁵ Ni taala aten niifdiya, amma mbi taala a altenna wa, kəl aten yamid shembed na.

⁶ Kəsər ko nana mid na taala, mbi tsaurha nura wa, kəsər kəkəfek ndən niya thləkrha. Amma mbiya ndikrha kaan atənggən wa, kəsər mbə minna sə a falgha niifa nggi ma 'ya nanən hu tsawud na wa, nduwa sək nən ahu labar na wa.

⁷ Kəsər ni də taala tə ənwultənggini kedee na nda, thlənən nda ndaha ba hu thlu fadna, təthlənda Sheetan ni thlənna nda ba ka bəgha səseerha tə kəm 'yade taala nən fa.

⁸ Katəra mahan nggi a hwan Faara ka a ndəgheghən hai təghən.

⁹ Amma nggəreghən sə, “Nggayid na tsuwodə, səsəmnggit na nəghən manggən hu yamid shembe.” Tsaunən kee, niya nggər taala kaan tə wutsəfayirha aten yamid shembed na, tənə səsəmnggit Kərəsti tsaurha a tenna.

¹⁰ Tsaunən kee, nggəmdī fa tə yamid shembed na, tə 'yaara, hu kətəlla fa, hu səsaarha, hu billarha kəsər ka Kərəsti. A sayiddi mbuwa ni tə shembe, hu sayidda ni, ni naarha tə shembe.

Billad Mbulus ka fa takkwaya na a Koronti

¹¹ Ənədi nuryirha, amma kunni keegha sahai. Kunni kəm kamngga a fal nggi nun. Ko nanən mbiyi a mii 'ya wa, tsauka tə ndaarha mamngya fa takkwaya Yeeso na yinun kal nda nggi wa.

¹² Tsaunən kee, ənədi ənwultengya hangga ahur nun, kərəs ni hu əna tar na. Ənwultenggini ya pər ndan tə ndaarha nggi təthlənda Yeeso ni yi kəkafek.

¹³ Hu yanggi kwamanggi ni kyadgha ndaarha mbuwun tal tə fingya kən hwan Faara? Kəsər ka karang ni kun fa a thlar dūn nggi tə wudəbəla wa? Nanən kee, chehema dimid dādə ya!

¹⁴ Nanənya, ngwadi fa na weng tala ni kun yi mahan. Mbiya kətəlang kun wa, kəsər kun ndəna minna, mbə wudəbəl nun wa. Kamngwa wundakhnaya tər rəfəd chinggindan nda wa, amma chingya ndəna tər rəfəd wanggindan.

¹⁵ Nanən kee, ni tək mbənda fa a bəlang di 'ya nani təghən ha heu tə altenna ka a dānggi kun sə. A nggəmdi kun kaan, nun thlahang nggəməndə də hadə wa?

¹⁶ Nun a nggəm fa tə nggi, tə ndaarha tsaukwi haghən a kun wa. Amma na niifa ndaarha əngang ni thlərbuyirha kun, wal yi kun tə kwaman nggabaarha.

¹⁷ A hur nafini thləngang ni kun də na yandə sə hukka kun wa?

¹⁸ Hwandı Titus a dəgha thləman nun də, thləndı wanma nəm də a samadghən. Nduwa huk na Titus kun wa? Mbə Səsəna tal na a laf kəm wa? Mbə kwamana tal nəm a takkwarha wa?

¹⁹ Nuwun a numad ndaarha nan a thlang fad

nan sə a har nun wa? Awo, naghan a ndikrha kəla na mid Kərəsti ndiyim a mbed Faara. Shayina nggəm ni, kala 'ya nəm a ənaarha, nan a ənaghən ka a dānggən kun sə.

²⁰ Kəsər niyi a tərəmnda, a bədība, mbi ba wal kun kəla na minna wa, kun kəm mbun ba wal nggi kəla na mid nun wa. Niyi a tərəmnda asəmha nagma yanda sə, tə sərəkra, tə hufrrha hura kaan, tə nggəm alteena, tə səb thləma, tə kiki ndan, tə manang alteena, tə kakyathlanga.

²¹ Niya tərəmnda a nggər di wutta thləmad nun də, na Faar na a tse ngguchit a mbed nun, tə kəm səbgha hurna də kəsər ka fingya ənagma dīmīyirha kaar, malang ngwanda dīmīyid ndan wa, ən tsanda, tə əna kulafayirha, tə ən shilee kyana nda sahai.

13

Nggəmi kəs thləmad Mbulus

¹ Yandıya ndəna wii tal na yi mahan a thləmad nun də. Kəla ndaana deleewar Faara, “Təta ni a kyagha 'ya ba a mii shedawaya səri nduwa mahan.”

² Hu wii tal na yi səri 'wadi teena kəsdi thləmad nafini ənagma dīmīyirha tə fingya heu a malangganda əna dīmīyirha. Nanənya mbuwani a thləmad nun, niya nggər kəs thləmad nun, kəsər a bədība mbə niifa sə hərəkrha ma tsətsəlla wa.

³ Na minnun sə a kyadang ndaarha ni kun na Kərəsti a ndikrha tə nggi. Mbə kədeng nən shembe hu ən ənadghən a fad nun wa, amma nəghən tə səsəmnda fa ahur nun.

⁴ Ko tawang na nda dɛ hu yamid shembe aten kadiirha, amma tɛ sɛsɛmnda Faara ni nanɛn tɛ yibrha fa. Ko nanɛn mbɛm tɛ shembe ahurghɛn wa, amma tɛ sɛsɛmnda Faara nɛm a tsaurha tɛghɛn ahu taara nan a ɛnaarha a kun.

⁵ Kɛkɛraman fad nun ko nuwun a takkwa Yeeso Kɛrɛsti tɛ kɛkafek, nama naarha kɛkɛrang nda fad nun. Sɛnggunsɛ tɛ ndaarha na Yeeso Kɛrɛsti ahur nun wa? Amma a mbɛ Kɛrɛsti ahur nun wa, tsaudɛ fɛldun hai hu kɛkɛrrɛdi.

⁶ Niya a shiteena nun a sɛndasɛ fɛlwum hai hu kɛkɛrdi wa.

⁷ Amma naghan a hwan Faara nun dɛ ɛna 'ya mbuwa ngga. Mbɛ ka a nagma fiya ndɛn tsauka kɛla pedna fad nan hu kɛkɛrrɛdi wa, amma a sɛnunsɛ ɛnadun ɛndi kamngga, ko nanɛn asɛmha nɛghɛm a naghɛn fɛldɛm hai.

⁸ Kɛsɛr mbɛ 'yasɛ nɛm ɛnang nda kɛkafek fa wa, amma kɛl a kɛkafek kee.

⁹ Nan naarha tɛ wutsɛfayirha fa a mban tɛ shembe fa wa, amma kun nuwun tɛ shembe fa. Naghan a hwan Faara a tsawun lɛlɛgdɛ kɛla nanun kaar.

¹⁰ Ndɛghɛn dani niya chireethleng ɛnggini kun hai ya nggi kula naarha a thlɛmad nun, kɛsɛr a badiɛba, nɛn ba tsawee fa ne ngyangthlang a kun ni tɛ sɛsɛmndɛdi fɛree na Faara a fɛrang kaali ni kun, mbɛ a weleng nggi kun dɛ wa.

Mii ngwala nda ɛn Mbulus

¹¹ A mii ngwaladghɛn shayina, kɛl fara sɛmɛn. Djitima tsawun lɛlɛgdɛ kɛla nanun kaar. Sɛghama hwandɛna. A tsauka numan nun tal tɛ ndan, tsawama dɛdɛm tɛ ndan, hu tsaurha kiya Faara

na tɛ nggɛmnda tɛ dɛdɛmnggirha nɛn tsaurha tɛ kun.

¹² Ndaman 'ya ndan fa tɛ fɛbrha yi nggɛmnda na chahal.

¹³ Nafiya Faara na chahal heu a ndang'ya kun fa.

¹⁴ Ngwa tsauka nggayid Chinɛm Yeeso Kɛrɛsti, tɛ nggɛmnda Faara, tɛ wumten tsawud dɛdɛmnggit Sɛsɛna Tɛ pɛdɛnda tsauka tɛ kun heu.

Hona Bible
The New Testament in the Hwana language of
Nigeria: Hona Bible

copyright © 2023 The Seed Company in collaboration with Language Developers and Bible Translators Association

Language: Hona (Hwana)

Contributor: Language Developers and Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-18

PDF generated using Haiola and XeLaTeX on 26 Jul 2025 from source files dated 18 Jul 2025

d942b897-c376-5386-bfaf-e0ce21c59136